

三朝遼事實錄

三朝遼事實錄卷之八

黎陽王在晉明初父編

男會苾穉薨甫輓閱

壬戌三月方震孺奏封疆失守奉

聖旨廣寧不守失事各官情罪深重國法難容羅一貫只一裨將守堡殺賊六七千至死不辱勇烈可嘉高邦佐以身殉難足媿偷生併祁秉忠都着查明卹錄其餘道將等官姑着戴罪防守經撫仍候旨定奪按廣寧旣潰監軍高邦佐赴松山見熊經略同事多諷以西走不聽二十四日夜邦佐謂其僕高永高厚等曰我受國厚恩義不偷生誓以死報之

矣好收吾骨歸里以見吾母即葬吾父墓側使知
有死事兒不絕也高永等痛哭勸之行不聽沐浴
衣冠西向拜如禮遂自縊死高永謂高厚曰主人
待我等厚我不忍主人獨死無使令于前者汝即
負我莫負主人言畢亦自縊死高厚年十九徒步
入京僅存皮骨爲佐姪高世彥道之甚詳夫邦佐
無弱冠之兒有八十四歲之母慷慨赴難從容就
義真烈丈夫哉經略以柴千束并公署燒之主僕
尸成煨燼矣

逮王化貞究問熊廷弼着革職回籍聽勘

方震孺奏昨之失着全因劉渠不遵前後計較盡撤
鎮武廣寧守兵僥倖一戰益鎮武兵撤則藩籬空廣
寧兵撤則威權去人心安得不亂至于出城一節實
因遼將孫得功黃進封火藥等庫迎接奴酋非江朝
棟先知其謀撫臣不免矣至于諸道臣有戴罪受苦
而無功者高出胡嘉棟也有聞廣寧不守隨經略而
西者韓初命也有廣寧人心既變城內相殺撫道幾
不免隨撫臣出城者牛象坤也有策應廣寧而廣寧
已陷者邢慎言也有因西虜縱橫人民盡逃而城廓
無恙者張應吾也此番失事變起呼吸賊生肘腋且

相隨經撫而趨情似可原然封疆旣失照律分別治罪亦復何辭

兵部覆方震孺本奉

聖旨高邦佐贈光祿寺卿廕一子錦衣衛實授百戶世襲與祭立祠還與謚併張銓何廷魁同祀該省在京鄉祠祠名山右三忠羅一貴贈都督同知襲陞三級仍與謚祠祭高邦佐父母誥命義僕高永優恤俱依擬其戰殞將士祁秉忠併劉渠等作速查明具奏吏部尚書張問達等會議得岩關一綫實係國家安危據總督王象乾疏似有深慮相應移咨兵部速

具回咨以便會題隨准兵部回咨稱督臣一疏極言
經撫未可出關此爲出關而言也至欲留經撫于關
內修工撫夷以圖恢復是時未見處分之明旨耳
今撫臣且被逮矣經臣革職聽勘矣經略員缺着
廷推速補矣言官累疏又申明前旨矣緹騎星馳
逮者業已登途行者必將解任皇言一沛有同渙
汗且經臣未逮按臣請勘朝議紛紜盈廷聚訟予奪
生殺惟命之從其或軫念岩關憐才使過總候
聖明裁斷本部左控疏待罪自請罷斥其何敢擅
議等因前來該臣等會同署兵部事左侍郎王在晉

等會看得河西復陷諸堡皆空戰與守并失之經撫之罪夫復何辭王化貞已奉旨拿解來京究問熊廷弼亦革職回籍聽勘似無庸于再議者惟覽督臣王象乾之疏山海係神京門戶安危關係非輕議欲姑留經撫待罪山海修守撫夷以戢定人心而保危關猶或可收桑榆以贖其罪此樞臣所謂軫念岩關憐才而使過也但恐明旨一到毋論化貞已逮登途卽廷弼亦不敢不回籍聽勘未審能追而還之以濟緩急否極力綢繆督臣畫之甚詳當與視師樞臣悉心而其爲守關計矣旣接回咨又伏商確相應

具題恭候我 皇上裁定非臣下所敢擅便也

撫臣逮經臣勘已奉

旨矣總督之疏亦緣情面

發于未處分之先斷無收回

成命復用經撫之

理乃吏部不肯任而推歸兵部時署部者在晉也

冢宰同少宰于朝房會議必欲強兵部議留而兵

部不允少宰王墨池大譟而兵部終不肯仔肩冢

宰張誠宇勒令在朝房寫咨即刻據咨以覆次日

周朝瑞上疏閣臣復有熊廷弼留着用之票擬

上怒令中使問輔臣輔臣曰熊廷弼似勝王化貞

中使如其言以奏 上曰熊廷弼走得快果勝外

廷聞是言而留用經臣之議始息然同黨不得不
深啣兵部矣

初二日三更北門鎖連響三聲鎖開落地隨即窺伺
並無人影○兵部覆科臣條議着錦衣張懋忠操練
班軍領班都司指揮聽之專制

王化貞揭職失守封疆罪應萬死第不宐以職之故
誣衆人鎮武副將劉徵率金礪殺入重圍劉徵刺殺
數賊中箭落馬金礪不知下落劉式章被箭貫髀釘
于馬鞍之上見有馮時昇等證之乃謂其先逃孫得
功黃進先登陷陣人所共見高監軍曾爲職言其回

城順賊必有計誘之者蓋小人以勝敗爲向背從古
已然何論此輩其家屬出城至二十里鋪趕回足知
非威謀也⑤高出揭賊攻西平羅副將悉力防禦打
死賊尸幾平城之半會藥彈俱盡賊用雲梯登城城
陷城上步戰與城內巷戰殺傷賊甚衆羅一貴死之
各將所統兵與賊相持至日昃逼賊與接戰孫得功
等當前忽開陣兩分若納賊兵者賊徧衝突左右諸
營背西兵也遼兵營開李維龍祖天壽等輒大叫而
奔其面鮑承先南面蔡汝賢等一齊潰走不可復收
衆出傳令收還鎮武無一回顧者及過盤山堡亦盡

空遂遷廣寧與撫院商固守之策豈意孫得功黃進
等入城倏忽之頃百姓奪門而走奸弁據門而守滿
城門沸殺人劫官遽而爲夷也哉出是夜與撫院同
至間陽驛次日又至太凌河見經院共議使撫殿後
經前行仍傳諭各道沿途區處潰兵逃民有諭帖見
在邢監軍可其質也嗟嗟奸弁之欲賣河西久矣去
冬奴旣不肯來百計誘我使往入春我覺不肯往百
計誘奴使來攘臂而逃鎮城者孫得功諸人也事至
今日亦復何言

署部王在晉奏臣惟晉朝廷設立言官值此封疆失

守之時持正者當定入關之罪案謀國者當議守關之長策至於閒言剩語盡付東流何必藤葛糾纏爲此無益之構鬪初遼撫差官冷繼祖口傳遼報乍聞之在疑信之間卽嚴關至重一疏原謂口報不足深信未嘗以爲確據也今廣寧陷矣守者奔矣縱使教塲劄營是實何抹於亡走卒之言原無塘報未能執券以相稽舉朝之論自有公評何必偏詞以定罪乃科臣劉弘化累疏抗言只爲劄營教塲求討糧餉數字謂撫臣王化貞於失城之後卽與衆同奔未嘗劄營少駐不窻以五十步笑百步也夫封疆之臣

不死封疆自有明明正正之法。或二十三日而走。或二十三日而走。其走均也。或教塲有兵而失地。或教塲無兵而失地。其失均也。今惟按最大之題目。以定諸臣之罪狀。何必屑屑然論走之遲速哉。若欲坐撫臣說謊之罪。而抹去失封疆之罪。是放飯流歎而問無齒呖也。失輕重之衡矣。邇緣遼事潰敗。臣挺身越俎。力屏羣囂。蝟集之案牘漸清。鼎沸之人情少定。怨勞獨任百責。攸歸。胡然而有卿貳縱橫極意逢世之語。當今世道已陂。人心大異。臣不能占風望氣趨會附合。使骯髒之骨化爲繞指之柔。其側目於臣有日。

矣。今幸以無聊之語不切之詞枝外生枝節外生節。所謂欲加之罪何患無詞者。微波一起定有狂瀾。長年操舟亟宜引避。臣知所以自處矣。奉聖旨邊事正急料理不暇口報審奏既明何必更辨。宜安心任事不得引避。

御史潘雲翼題今日招兵之官紛投越俎濫觴一至此極政府招兵矣。豈非欲河魁在手權奸惟其所作。用乎計臣招兵矣。豈非謂版籌在握軍餉易爲呼應乎。陽武侯招兵矣。哆口當關之虎豹而又云萬人止可護京城却耽耽于厚餉重糈何爲乎駢馬王昌之

招兵甘心權門之鷹犬已被公疏摘發其奸輒信信
焉抗疏肆辨何說也。鋼輪地雷等砲有何不傳之秘
以中外謠言之李天臣槩閉之將軍教塲而任其造
作六丁六甲之陣俱屬不經之說以遠邇煽惑之蘭
國威尚令其出入都門而莫可究詰諸如此類難以
殫舉興言及此殊可寒心乞 勅該部及巡緝衙門
嚴行稽查踪跡詭秘之輩盡爲訪拏庶亂萌杜而
神京鞏固矣

河西旣失 京師勲戚各欲招兵駙馬王昺疏先
得 旨允其招募矣疏下部晉久之不覆閣臣沈

公淮謂余曰年兄何堅執如此余謂本朝無駙
馬招兵事例且此屬盡爲身謀一有緩急止圖自
衛國家安所用之椒房之戚有耦猜之嫌一下
招兵之令長安中奸宄盡入其門輦轂之下將
有不測憂不在巖關而在蕭牆之內也駙馬公見
予大譟輔臣周招兵者力爲左袒予終置之弗應
而已

王在晉奏慨自河西失陷文武諸臣抱頭鼠竄臣叨
署部篆自當按法叅論乃科臣劉弘化不以朝廷
封疆爲重而只爭口報中劄營教場之四字此四字

有何緊要明知其非緊要而數數爭之謂遼撫之走
不後於經畧耳同一淫奔之婦不罪淫奔而爭淫奔
之先後異哉科臣之論今日傳之海內他日傳之
國史知天啓年間有此奏疏不可無樞臣之一駁也
自有樞臣之一駁而科臣語塞不能措一詞乃轉云
樞貳之誤國夫閫外之事經撫主之守不成守戰
不成戰自有任其責者以樞貳爲誤國當初何不
廢經撫而專責成於樞貳微臣總理三部兵不足餉
不敷器械不給則臣之誤也兵足矣餉敷矣器械給
矣委而弃之者何人非臣之誤也非臣之誤則非臣

之罪也。至謂經撫單留兩留之議爲樞臣所持。單留之議在正月望前。至二十日而奴兵已渡河矣。數日間卽御。颶車羽輪不能更換。此時欲議抽回一人。不幾於說夢耶。若論失封疆之原故。人人知繇經撫之不和。而不知經撫僞爲不和。以圖卸担。以掩失封疆之罪。不和二字可以欺庸人。而不可欺當世之豪傑。比其敗事欲諉罪於內。而云稍悔前錯。夫部臣何錯之有。錯於推諉。而不錯於責成。豈協贊戎樞者錯。而棄城失地者反爲不錯耶。豈抗疏糾叅者錯。而奔潰入關者反爲不錯耶。經略非累人之官。六科舉臣臣

不以爲德。亦不以爲憾。中府會議之日。弘化在焉。而謂未嘗先聞。意者添設借題。有警乏才之歎。此疏非弘化之親筆耶。今廷推不論才而論圈。計圈則當居後。論秩乃爾居前。此會推之異體。尚候聖明之裁酌。皇上未經點用。而科臣先設猜疑。釋憾之語。以爲異日呼號同類。媒孽之張本。是科臣竟日車馬奔馳。商量計策。真爲得算。而未望臣之進步。先爲臣畫退步也。科臣此後無贅言。而臣恐不得不言矣。奉聖旨。中外多事。正苦議論紛淆。王在晉佐樞。任事不避嫌怨。這所奏事情。前後具明。無俟深辨。科臣瀆奏。

已有旨了

御史左光斗題項東師再潰舉

國震驚

皇上慨

然允廷臣請用孫承宗入閣矣又用解經邦經略矣
外而封疆收拾有人內而密勿贊相有人一時似覺
可觀而中樞之地尚虛懸無屬在當國者或自有說
惟是以至危至急之勢而缺至要之官人心洶洶莫
得其故查景泰三年于謙爲本兵兼用儀銘七年謙
因病在告又用石璞往時兼用兩人而今不得一焉
偶爾有病且不能待况併其官而無之者乎竊謂
朝廷旣得救時之人當竟救時之用若如 祖宗朝

閣臣高拱出掌吏部江淵出掌部故事 特命承宗
兵部事庶幾授之以事假之以權承宗必有以自効
而一日在閣一日在部叅贊專決亦各不相妨救岩
關而揚我武莫有急于此者也乞 勅元輔早斷以
定大計毋徒用其名而靳其實至職方郎中耿如杞
屢被彈章義難就列併乞速賜處分毋徒滋人言而
悞國事如杞在戶部時職曾薦其可用今日罪在封
疆職不能爲之諱統惟 聖明裁斷 宗社幸甚奉
聖旨兵部事着閣臣孫承宗暫掌

孫公一日入閣一日于兵部大房決事左右侍郎

力趣之終不出堂凡發一疏更削數次寫本人役甚苦之部務如叢日至壅積予初總理三部及署部篆晨入暮歸無晷刻之暇今得越旦進部曠日悠閒心熱于邊聲之至急矣

署部事王在晉揭河西失陷後人情洶洶都人士莫不潛窺動靜以卜安危若本部張惶無措人心鮮不動搖是以外示鎮定而心實岌岌焉每日戴星披衣侵晨入部治事漏下數刻方回凡屬防守山海薊門京師畿輔及募兵練卒調援入衛緊急事宏靡不畢舉當本兵行遄之月職方杜門之時外急邊籌內弭

國患心搦筆疇頭須爲白神稿血枯而職且病矣凡
題覆疏百餘字句冗長報多不錄祇將目前緊件併
山海薊門兵數聊述崖略明開臚列年來百事情竄
卽極力振刷未能卒辦若徒陳紙上之空談緩急奚
裨惟中外百執事共圖之

在晉辨熊經略揭向來遼事因經撫紛爭職調停極
苦議論極平未嘗執意主戰舉朝靡不知之卽熊
芝崗以見聞述相遺亦語職曰老公祖主守者也職
何敢誣手書具証奈人情各異混扯浪猜中藏結構
殊不可曉援兵東行關門點發悉繇經略兵權在握

豈曰無兵撫數談戰明白以虛聲告便當信其爲虛何必扭之爲實故不和而爭非以實爭也奴賊過河西而師敗非我兵過河東而戰敗戰守之罪不知何居職今決策東行成履虎之勢無騎虎之謀一揭入都其應如响風狂浪急而以破舟漏艦相加遺汔濟與否天下萬世必能諒之職可無言矣

先是熊公揭有爲東事而添設者未經東行一步蓋指晉也彼時以東行必無幸驅之死地不容其獨生一國事至此真無可奈何委身聽命而已

大學士兵部尚書孫承宗題臣仰見皇上留心邊

事加意用人。頃銓臣擬宣撫解經邦爲經略隨奉
旨擢用。一時爲快。而亦有以嘆爲惋者。不意經邦肋
惜于北。膽落于東。頃若此。總緣敗衄相仍。累囚接踵。
故奮起功名之念。不勝其苟全性命之心。彼其黃金
橫帶。調經緩于杜門。白羽驚心。肆嫚書于山啓。不知
國家養士。謂何而有此也。年來因循既久。誕謾相成。
利則衆趨。害則衆避。無復羞耻。無復撿繩。若不立誅
一切弃疆忍死之臣。更取諸奉命不忠。任官不效者。
立繩以法。恐魑魅公行。豺狼難問。凡食祿担爵有國
家之責者。任其相護相徇。忍于負朝廷。不忍于負

私友此其保位全體寧減于經邦而尚敢譏笑其懦乎。且如四川招兵科道明時舉李達狗狠狼貪。旣切傷桑之恨。藏頭縮尾。尚稽懸藁之誅。蓋臣兄川東道孫好古以二人之起釁而死。臣故知其貪狠甚詳。而西南半壁爲騷。何可不一問也。又如南路監軍道梁之垣。未棹鳬舟。先邀麟王。晝炫家園之錦。夙占海上之槎。方奴酋內犯。曾不聞一矢相加遺。而侈爾腰纏居然矐矐。是固與萊撫陶朗先同科。何可不一問也。又如招兵御史游士任壯猷。未結于北門。蚤譽先騰于蜀望。其兵幾何其餉幾何當。主上憂勤之日爲

故鄉富貴之游。豈柱下之彈文。僅爲他人設也。耶。何可不一問也。又如遼東監軍御史方震孺。時當並水之蛟情。苦兩姑之婦。旣厚師門。兼懷友誼。曾不思人臣一意公家。寧得曲徇同好。臣以公郵曾勸其力爲明主忠焉。而不能用力也。作好軍中徬徨塞下。何可不一問也。又如薊州兵備邵可立。偶遭亂卒之變。旋來御史之言。卽清謹有執。而未正囂陵遽難展布。何可不一問也。又如經略熊廷弼。巡撫王化貞。罪可詳核。法當並逮。撫字已難再入。剛愎詎可重來。而力護同心。各爲左袒。鶴表方殘。虎爭正力。豈是非在城郭。

人民之外。而以經邦裹足。遂謂天下無豪傑耶。何可不一問也。以上數臣。或雅負才名。或誓匡多難。而志有所不滿。力有所不能。總之視國不若其家。愛身不以其道。殆有視經邦過者。且其事盡關兵政。故臣得執大義以繩之。

疏出樞輔。時望赫然。乃其所抨礮之人。後來輒多揀援。代爲辨析。首尾兩端。如出二人之手。殊不可解。

吏部等衙門。尚書張問達等。看得今天下事勢至危矣。廣寧失守。一牆之外。即爲賊窟。所恃以遏方張之

强虜莫艱。旣之國步者。惟經略一臣是賴。故得人不得。人在昔也。利害止中于邊疆。在今也。禍福將貽之。廟社。况舊任者旣勘。續推者復斥。則選擇而使尤萬萬不可苟且者。臣愚以爲獨見有限衆論難淆。倉卒則未詳。慎重則無悞。于初四日會集九卿科道等衙門于中府。每人給筆使各註堪任職名。羣議紛紜。至暮收單。命文選司郎中王洽手彙。臣再商之閣部諸大臣。又以爲舊歲中府會議添設兵部侍郎王在晉。原以備經略之用。今茲舉者更衆。單罔可憑。則臣部又安得外會議而他求也。恭候 命下即令速赴山

海駐劄視事一以見國家尚不乏人一以見臣等不敢專擅臣非敢因噎廢食而故爲此鄭重也再照文臣知軍旅起自近代而經略則昉于弱宋才不必追韓范目不必識韜鈴事急則強之節鉞事敗則逮之囹圄此猶人有膏肓之病而以身聽庸醫試藥方者也伏望皇上簡經臣之後即勅令兵部亟選大將推轂而任速爲函關丸泥勿專以軍旅責文臣也今新經臣未定山海無統攝之人仍乞再頒嚴旨令視師兵部尚書張鶴鳴同總督尚書王象乾將守關事務一一共行料理以需新臣之至不可使賊

窺我虛實而生其長驅之心至新經臣更望 天語
叮嚀若其樹有成效即加不次爵賞庶足振勵人心
責之賈勇封疆幸甚

三月吏部爲欽奉 聖旨事奉

聖旨王在晉陞兵部尚書兼都察院右副都御史經
略遼東薊鎮天津登萊等處軍務寫勅與他邊事正
急着刻期就程不必疏辭

解經邦補削後人無肯任經略者閣臣沈公渚語
冢宰張公問達云王憲葵有福相其人似可當重
任蓋司寇王公紀也冢宰謂予云憲葵與公善可

往一探之予謁王公告以故公不辭不任即以復
冢卿次日王公會予于朝房執予手曰此烏程以
宿忿害我也公向冢卿勿慙慙又一日而王公疏
叅閣臣之修怨矣人情之畏避若此予如堅意再
辭豈不輕 朝廷而羞當世哉

在晉辭疏奉

聖旨封疆重寄卿以猷望簡任空一意肩承用副委
託仍遵旨刻期就道不准辭○在晉得 旨即行

通政許維新書云數年前遼人掘得碑上云又女
木子欺日月八牛九鼎堅如鍊三門一土嶺頭看

腥山染盡冬人血此語天下通傳至今一切符契

一土王姓三門必閤監軍奴自姓佟想當膏斧染

鏐于關山之外非曲說也

嶺頭高第也

○御史楊新期

書云前歲已傳有大將在吳之占今其驗矣顧近日亂視亂聽者甚多堪集思廣益者甚少語云閫外將軍制之可用則用不可用則置之總不必與爭于筆陳也奴賊飢則攫取所必至第堅壁清野彼窮極生變亦理有自然惟持重必慎至望

經略王在晉奏臣至謏非荷蒙

聖恩拔臣於儔儕

委以經畧重任今

天下事孰有急于遼者耶

朝

廷用人孰有重於防遼者耶以社稷山河之重而
根基命脉寄于一丸泥隄防疎密安危立判左山右
海人以爲天關地軸而不知山海之無足恃也關以
外付之祝融燒殘之餘燼徒存關以內惕于風鶴奔
北之驚魂未定鈍戈朽甲委頓成丘廢堞頽垣凋零
度歲臣雖未履其地而逢人細問城未增而高也池
未鑿而深也兵雖多而不知練也將雖有而不堪任
也欲恃兵力而兵力不可恃恃人心而人心不可恃
恃地險又不可恃臣之所恃者祖宗社無疆之曆耳
聖明出類之資瑞應河清一人有慶爲百靈之呵

護耳。臣藉朝廷之福撐架危疆萬事身有無敢遜避。然必內嚴而外自治。內安而外不危。則今日之急急于憂內。又微臣一念戀主之情不容自己者。請得而陳其略可乎。一曰防內患。夫兵以弭患也。而不戢且滋患。當河西初潰。都民惴惴焉以募兵爲急務。而臣知輦轂之下無兵也。招兵則間左之豪草澤之雄一時畢集。竊切必多爭鬪必甚。焚掠必起。臣是以不肯多招。而又申嚴入城之禁。蓋無兵之患。患在虜。有兵之患。患在兵。虜之患遠。而兵之患近。務宜督責招兵將領。嚴加挑選。拳師提手。須用防閑。賭棍酒。

徒悉行汰斥一兵爲橫一伍竝坐。凡暴戾兇惡之人無容混入。以致敗羣。其有自關上逃歸及通津食糧原兵去彼就此。弃少就多者。押解歸營。仍以軍法從事。庶得兵之用而不受兵之害矣。二曰詰內奸奴。自清撫開鉄以及河東西之陷。何者不繇奸細之潛伏。其用計最詭。用財最廣。用人最密。故破奴之法。莫要于查奸細。都城一載之安。殺劉保之功也。今長安之爲劉保者。不知幾何。緝奸之人。卽爲奸細。故詰奸不在遠。求之左右。而其在也。向來五城各坊未聞一獲流民之中有蠹焉。潰卒之中有賊焉。城市之間有

窟焉。腹地無奸賊。必不來。卽來不深入。城內無奸賊。必不犯。卽犯而城不陷。緝奸者必精察而後能得之。必重犒而後能購之。一家容奸。卽將本家財產盡給。獲奸之人。知情者並斬。保甲容隱者連坐。臣於山海薊昌等處。卽以此法行之。無敢縱矣。三曰飭內備內。備者何。積柴米。運磚灰。買煤炭。凡油蠟銅鉄竹木皮革等舖。遇警卽搬移入城。凡倉庫牢獄僧房水戶等處。遇警卽謹嚴稽察。凡弓箭火藥銃砲刀槍等件。遇警卽檢查整頓。凡軍民匠役丁夫精勇等項。遇警卽分撥坐派。營屯臺堡之急修。哨探守望之必謹。今都

中緊事莫緊于築重城以重城可階梯而越也莫緊于守草場以草場可火箭而焚也人莫侮予則有未雨之綢繆在矣。四曰嚴內衛。洪武間凡朝叅午門先放直日都督將軍及應直帶刀千百戶散騎舍人以次而入。上直官軍三日一易于朝。退辰時交代。凡內使火者出門必比對銅符密加搜檢。今漸非其舊矣。班行業雜防範疎虞。羽林伙飛但消糧而掛伍。金吾力士徒列戟以排行。至于虎賁龍驤破衣敝履。皇城守衛值常朝之日有疲卒數人持棍邀喝。至于等閒時日查點不至任其高臥。是以內地常虞失盜而

異奸未免潛藏申嚴 祖制銷萌剔蠹庶 皇居遠

密可杜蕭牆之釁矣五曰節 內供年來遼左軍興

供億繁浩甚以川苜造孽支應東西新編五百萬有

奇而歲費且三倍焉民間之力竭矣外無可供則不

得不取給于 內帑而 內帑非淵淵無底之物也

取亦有時而窮用亦有時而盡 皇上欲恢復遼左

城郭人民須從新肇造芻糧軍器須從新揀運將來

經費不可勝筭即防守山海而築城造堡建臺修墩

犒軍買馬整器治械所費不貲如欲聯屬西虜歲費

尤難預計必非司農所能克辦也 陛下于燕閒之

朕須密密清查御帑倘瓊林大盈之積易竭難

支百凡內庭供應服御頒賞之類俱從節縮以

佐軍興臣亦當量力而進不至束手無措庶免尾大

不掉之患矣六日急內應關門駐劄兵馬一應本折

色芻糧銀兩銃砲盛甲車仗等件悉取給于戶工二

部惟是外間待用甚急而內事悉多耽延疏發數日

而抵京三日而得旨又遲一二日而得科抄有抄

到累旬而不覆者有起解浹月而不到者來者急足

而馳去者緩步而應以呼吸之軍情爲等閒之漫視

臣今又外出矣將來恐痛癢不關秦越坐視臣深有

憂焉。請與諸臣約。凡本章一下。公移一到。朝至而夕應。如過三日。卽令科臣叅奏。着所司回話。庶聲响相應。表裏協一。不至愆期誤事矣。之數者皆屬君心之運量。廊廟之主持。而其要又在皇上之清心寡欲。勤學好問。親賢遠姦。感格天心。以綿國造。臣願竭狗馬盡力封疆。奴酋不足平。而聖世中興之業。卜期可睹矣。忠臣去國。不忘其君。一得之愚。以當獻曝。惟聖明之裁督焉。奉

聖旨覽卿奏具見深慮淵猷。着各該衙門用心料理。內供當節。朕知道了。卿啓行在。卽特賜蟒衣玉帶還。

與尚方劒行事勉建功勳以慰朕望該衙門知道
在晉請帶司官分理奉

聖旨沈滎素稱勤幹着同卿前去委用

御史陳保泰題叅贊畫何棟如當遼陽報陷之時募
兵浙中及今廣寧再陷之日贊師關上其自許慷慨
似有可稱而孰知其不然也何棟如領南部錢糧不
知幾何但聞其到浙中住虎林書院遊湖登山酣歌
嫖賭月無虛日聞與浙宦柴應楠一夜賭輸至三千
餘銀此三千之數從何來哉皆南中攜來買兵之餉
也科臣蔡思充言其錢糧自領自散難以稽查事皆

有據言非風聞且不但此也夫富商不肯爲兵船貨不可用戰雖三尺童子皆能知之而大開騙局入告至疏奏之後亡命虎棍徑自封船臣鄉商人如張棟洪喬宇等共三十餘船每船各送銀千兩乃潛放遁去大盜禦人白晝攫金自杭城內外居民行旅被兵搶掠者又不知其幾千百矣至買察將吳錦衣假割募兵幾致激變皆何棟如爲之也彼其自謂二十年言兵夫使棟如有奇謀秘計不可測識臣不敢知若言兵而欲招富商爲兵改商船爲戰船其昏憤誕妄伎倆立見可堪贊畫否以條奏之疏爲開騙之局大

膽欺 君肆行無忌此其罪可勝計哉臣望 皇上
亟罷何棟如如科臣議稽杳募兵錢糧額數并行追
贓正法庶貪臣如何棟如者可警也

經畧王在晉題伏念東事離披一壞於清撫再壞於
開鍊三壞於遼瀋四壞於廣寧初壞爲危局再壞爲
敗局三壞爲殘局至于四壞捐棄全遼則無局之可
布矣逐步退縮至于山海此後再無一步可退故今
之所稱經畧者比前更難而今之任經畧者比前責
任更重人以此爲棄官之地亦以此快報復之私臣
以駑材責之千里旣鞭策漫加忍視嶮巖之顛蹶又

羈韁緊扣直令蹶躓之難前不行則以國法繩之
詞嚴而義正。既行則以微言中之。謀詭而機深。甚則
借事以綴名。無端而起訕。使聞聲者或併疑其人。而
顧影者必潛匿其跡。不痛不癢。無所用其搔爬。若淺
若沉。實以藏夫譏刺。平地忽生荆棘。暗中盡伏戈矛。
真使笑啼不敢。行止皆難。此今日之時情也。即使奴
酋捐金反間。亦難得此舛豔之人情。國家何負于
羣臣。必欲覆雨翻雲。顛倒簸弄。以人主爲孤注哉。
臣歷俸三品四閱年時。祇緣道路奔馳。尚虛時日。未
經課滿。尚書循次。非若起家廢置。越次超陞者。試問

通國人情誰肯直任經略臣若不行使奴酋奸細聞之是羞中國也。謂當世真無禦侮之士滅奴之人。是輕當世也。臣不敢爲毛遂之自薦。亦不敢效王陽之逡巡拜命。卽行以壯本朝士大夫之氣。故知臣者與臣憐臣者慰臣而妬臣者思媒孽臣。臣當此萬難萬苦之事。未易求全。處茲至險至危之地。何難吹索現前無罪可指。亟宜打透機關。矜全末路。倘遂臣而使之歸。臣之所大幸也。不然而陰謀構鬪。禍移于國。臣之所不忍聞也。封疆告急。非臣子舌爭筆戰之時。但願皇上默矚。臣鄰中議論孰爲正直孰

爲頗僻孰爲爲國孰爲爲人邪正之分是非之辨
自莫逃乎。睿照天下事決裂至此尚不回心條慮
急抹傾危而徒立戶分門互相攻擊恐

三祖十宗在天之靈必將昭鑒非以愛國亦非所
以自愛也。臣行矣不復深談。朝事一心以急邊籌
矣奉

至旨巖關重寄卿能一意擔承中外倚賴誰復求多
覽奏忠計苦心朕悉洞鑒向來議論偏私已有屢旨
痛誡大小各官當共以國家爲念務令任事勞臣盡
心展布毋蹈前轍期濟艱危該部院還一體申飭

四月王在晉題近京險要臣惟王公設險以守其國以不可升爲天險山川丘陵爲地險我國家奠鼎北平遼東左輔所依爲險者也遼瀋沒退而守河西則險失矣乃河西又失退而守山海山海一關不過防軍民之出入稽商旅之往來左爲山而右爲海所以名山海究竟則猶郡邑之城郭也彼遼瀋開鎮廣寧皆東方之重鎮且望風瓦解豈一關所能獨禦哉榆關旣無險足恃則自都城以達關門凡可屯兵結陣者俱當默察其形勢辟之居室者然繇藩籬以及堂奧層層節節俱有關鍵而後盜賊無生心也

此有 國家者所當亟圖也近 京者爲通州州有

新舊二城頗稱堅厚新兵幾及一萬倉糧亦有數萬

臣以爲畜兵于 京莫若畜兵于通相去四十里一

呼卽至 京中得兵之用而無養兵之擾第通糧較

薄而 京稍厚厚薄相形兩軍未宜並處耳過通

爲三河縣縣東十里有河通寶坻冬夏水不涸挑淤

沙濬之使深壅河流漲之使濶阻上則沙可囊潤下

則水可毒河之東有山可伏兵距河多築土堡藏火

器山中伏發首尾擊之敵勢必殺卽不能曠日相持

而少遏其狂鋒亦可令近 京一帶地方整備三河

以往爲薊州山不甚險然城郭依巖又當孔道設以重兵守之賊不能過玉田豐潤道途平坦非宿兵之地第見流民接踵哀哀乞賑而各縣庫無長物倉無餘粟臣以單車就道未經請帶錢糧愧無以應止令報名批所屬查議賑恤而無米之炊恐不能使流民之果腹也行次永平城外有山有水山可設疑設伏流沙旋繞澗水潺湲阻河而軍擊其半渡我踞其勝賊不敢窺關門以內所恃爲垣壁者第隘口甚多倘賊繇他處漫入永平非必繇之地而各隘守軍掛虛籍冒虛糧軍弁放班以取利戍卒高臥以偷安營

馬因差役繁苛草料騰貴馬骨峻嶒悉成下駟所謂有可守之地而無可守之兵副總之設當非過計矣薊永之間物力大困既開冶局又設木場既買豆料又供芻草草一束連腳價二分五厘而盤運交納每束費銀一錢有奇及至交收各兵用以充薪而不入于馬腹民利于折乾軍亦利于折乾而馬死不問馬不死而進草之人必斃矣今軍械甚乏取之工部工部已虛取之薊永必買鍊于它方聚工于別郡卒卒不能湊手夫爲遼而空薊永今又役薊永以防遼推之昌平宣大各鎮空虛亦然遼不能存而各邊有陪

危之勢甚以遼民充塞釀成腹心之患殆不可測則今日之籌邊亦未易言矣。自通及永中路城堡如邦君鎮沙河深河驛堡俱新築皆可以守。但蕞爾斗城未堪堵截。惟榛子一鎮可以屯劄千人爲襟喉緊要之地。籍令民不奔而効死是處可用爲防。其奈正官多缺政事久弛如永平一道一年三易昌黎一縣缺官不補樂亭遷安二令俱病臣經行七百里所遇止三河盧龍撫寧三縣令通灤二州守而已烽火達甘泉而州縣之堂閒無其人。乃山海一關銅章墨綬之繫者車輪馬足之充盈益寡裒多在用人者所空急

講矣。臣諦觀近事。人情墮于積玩。吏道敗于因循。紀綱頽于姑息。財用竭于供輸。武備弛于調援。厝火欲焚。而燕安如故。漏舟將覆。而及溺不憂。日挨一日。幸其不來。來則惟有打疊行裝。急忙奔竄已耳。人心如此。臣卽極力振刷。恐不能頓挽頽波。矧大敵之後。求治太銳。勢虞中格。而邊情急于風火。又未可忽。忽悠悠。須臾少緩者。目前百事必須從新做起。着分毫舊套不得。不識同事文武諸臣。能委心以相從否也。奉旨。這奏內事情。各着該衙門作速料理。應奏請者。卽行奏請。不得就延誤。事邊疆緊急。全賴大小臣工乘

時協力內外相應若仍前怠玩查出重治不貸

給事中倪思輝等奏曰三月十九日奉有駕帖二紙
一開杜茂等一開修卜年科臣熊德陽當即僉名付
訖第虞等之一字開告誥之門滋羅織之禍特爲戒
諭尚書張鶴鳴有奸細已入膏肓一疏內稱科臣止
許拿杜茂一人如多拿我上本叅等語科臣隨蒙
旨調外任用吏奴酋發難以來慣用奸細誰敢以私
縱之但渠魁律應懲其奸而株連法須防其濫我
祖宗朝凡奉 駕帖必付刑科僉名自有深意非徒防
奸亦以資駁正也竊維杜茂奉 旨逮繫而等字不

祖

無多起葛藤科臣仰體聖明旨無得驚擾地方波及
無辜之論再申約束樞臣乃突出一疏橫肆挑激且
拾細人之口入告君父是誠何心哉伏乞聖度
包荒亟勅德陽照舊供職人心國是永賴之矣
張鶴鳴題經略答應官孟承勲舍人王朝玉九人渡
河挑奴進兵十九日奴兵過河劉渠與監軍道高出
在鎮武堡議奴兵衆空守又戒西平堡副將羅一貴
嚴守巡撫亦嚴令謹守不可戰參將黑雲鶴要戰羅
一貴不能止二十日將兵出戰敗奔至西平堡門奴
兵追及死之環攻堡無次城上砲石打死奴兵無

賊屍幾與城平李永芳使人持旂大叫曰知道守城
羅將是好漢速降同享富貴一貴大罵曰朝廷何
負逆賊而反使人城上持旂招之曰賊速降免賊死
永芳大怒併力攻之矢石火藥俱盡城破一貴死都
司陳尚仁王崇信同死二十一日經略差王榮持高
柄牌硃書總兵官與將官不上陣者與千把總同斬
千把總不上陣者與軍兵同斬一個不上陣者一隊
斬一隊不上陣者一哨斬一差人持旂發諭帖與總兵
劉渠渠見諭帖面色如鍊即上馬督戰高出止之渠
但搖頭不應而出此道將同口一詞與參將劉定邦

渠家丁黃雄所親見親供者也總兵祁秉忠家丁督
兵力戰砍奴賊數千前隊乃遼將孫得功祖天壽等
先分左右退走後面馬兵盡逃二總兵死之劉渠將
印付家丁黃雄賁出雄哭欲同死渠諭之曰全一朝
廷印亦是汝功雄出回頭見渠落馬賊圍數十重死
亂軍中祁秉忠中二刀三箭家丁扶掖馬上殺透重
圍而出死于途家丁爲收殮扶襯入關主將旣死所
損軍兵不知其數副將劉徵直衝奴陣手刀多賊
遊擊李茂春鎋鞭打賊落馬不知其數家丁槍棍殺
死多賊茂春中箭落馬此三人者死之最烈者也都

司趙啓禎副將麻承宗遊擊張世顯守備楊春茂千
總王應舉俱同死于沙嶺都司周思堯刀傷鼻梁其
中軍張中二箭陣亡軍丁四百餘名遊擊蔡汝賢已
將奴賊黃旂兵一枝殺退因遼兵奔潰被圍腿中一
鎗一箭陣亡兵四百六十八員名守備李永培中四
箭陣亡軍丁二百餘名頗希牧頭重傷三刀臉中一
箭陣亡軍丁七百餘名都司僉書丘臣頭中一刀頸
中一箭陣亡軍丁六百餘名其餘死者查有不的須行
原調兵衙門查核此兵將血戰之情形也○又奏報
西平潰陣者爲副將李性忠參將江朝棟高國禎李

承先別鎮周守廉黃鉞遊擊劉恩左輔戴極杜學伸
李元勳都司李承先鄧茂林史光裕尤岱許子敬張
惟德高岍李慣丘臣吳登雲共二十二員自廣寧不
守出城而西者爲副將王光有倪寵參將李滿倉黃
中順王楹遊擊徐璉盧養才陳京杜芳尚志弘高從
龍張世胤王藩李朝棟李秉春汪翥陳一元劉雷共
十八員都司張景珍張大忠守備楊九經係督臣發
援廣寧止到二日劄營城外叛民從城上打銃劄營
不住隨而西還此不當以逃論者自閭陽隨經略爲
副將孫諫毛有倫吳自勉參將賀謙平四知王秉忠

侯一品遊擊李逢恩都司談堯德景國佐共十員調
援廣寧不守半途而返者副將竇承武參將楊應乾
陳琚王之棟倪承勳五員守廣寧以西各堡因經略
驅民入關各隨回關者爲副將王牧民參將周于才
遊擊朱梅備禦劉源清安邦竇承功共十六員俱無
罪內周于才領家丁數名力守八里庄仍應論其勞
者也副將王光有守廣寧北面至死不開門撫院親
筆寫王光有速開北門七字光有始開光有亦應免
罪而諸將如別鎮盧養才尚志弘高國禎等夙有戰
名宿將難得斷不可弃陳一元始終護衛撫臣患難

不離義更可嘉戴極在廣寧貪縱不法被人告發逃
入關內虜人妻女不奉明文擅招遼兵三千餘名自
剖一片石人心疑懼又經略單騎至一片石人益危
恐已經職會同督臣拿問外其他各弁俱有敗奔之
罪然法難加衆宜斟酌議法或許立功贖罪至若參
將賀謙平四知此二弁者原統車營步兵經臣令其
押車砲徐行二弁先奔致車四百輛大砲八百位棄
置十三站道傍然將兵四千名入關無一人逃者罪
功應准除細打貫耳外如都司吳登雲王謙亨守備
張効祖王詔李思賢此五弁者旣望風奔潰又不聽

候處分逕自逃歸法當擬斬張効祖入關領正二月
餉拐逃此決不待時者也劉渠署中軍事戚允成內
丁守備梁邦弼內丁都司郁登雲臨陣而逃律有明
文法當如律重擬外尚有不知下落者遊擊李元勛
都司劉守清守備沈松夏國卿四員名又有叛而降
奴如叅將劉世勳遊擊孫得功劉世功金屬閭印高
忠選黑際盛羅萬言熊錫楊可大高鴻中黃進索萬
全李維龍劉式章王有功劉元慶蘇應科岳宗太朱
世勳共二十員或素與奴通亦有戀其妻子家業遂
甘淪于夷而不顧摠俟恢復以正刑章巡撫中軍祖

天壽臨陣脫逃。藏覺華島。按臣使人招撫。待到另行
定罪。副將鮑承先殘兵皆云戰死。關上人傳未死。鎖
萬金。聞河上撥探死之。又傳降奴。至于入關。逃將守
備而下。極多逃兵。十有八九。一時稽查籍貫姓名難
的。俟查明另行具奏正法。

王在晉題邊情。疏臣聞治天下者。內順治而外威
嚴。順天下之情。則治。拂天下之情。則亂。臣奉命期
於平定。安集。必先察其情。而後默默以爲之。調劑顧
今之所謂邊情者。不過民情。軍情。將吏之情。商賈之
情。遼人之情。西虜之情。以暨四遠之情而已。昨關外

之民闖關而入者累百萬婦子相挈老幼奔踰舉足而廬舍盡焚。回首而城闔非舊。膽寒於傳。吠氣奪於狂奔。散逸之神。蒐收歸不迭。亂離之夢。寐過去猶驚。强者思搶懦者思逃。此邊境之民情也。西平積弊成丘。山海放生有路。操戈拒敵者亡。弃甲曳兵者活。兵未遇虜而懾虜之威。虜不見兵而促兵之步。不脛而自走。無翼而欲飛。此關隘之軍情也。守令故匿其長以求調。將士自呈其短以待參。三協路之內。被糾之將甚多。七百里之間。見任之官有幾。蓋以去危爲厚幸。以被論爲卽安。青年巧圖托病。白簡甘就如飴。此

近邊將吏之情也。澤梁之禁雖弛。水陸之珍不至。商
屨久絕乎貂參。士女罔餘乎布粟。求之土產。旣不能
供。索之遠鄉。卒不能致。藜藿如金。何言珠粒。芻秣增
價。安問桂薪。人集五方。市無一貨。此邊方商賈之情
也。弱肉逃豺狼之吻。終宵爲鴻雁之鳴。待問家園。恨
無情之野火。徒懷明月。無可托之鷦枝。身世流萍。如
怨如慕。浮生寄寓。可夏可夷。眼前盡是蒼生。溝底將
成白骨。此今日遼人之情也。挾我之賞。飢則附人。畏
奴之兇。飽必颺去。結犬羊以信義。寧忘投骨之爭。置
虎豹於隊側。或貽噬臍之悔。搬銅運銃。關前故示夫

殷勤借牧移屯口外恐成夫久假猛獸不啗未可爲
安悅狙有方聊存玩弄此今日西虜之情也若夫四
遠之情則尤有可與者焉術士挾讖緯之誣妄言禍
福妖人倡白蓮等教謬托焚修悲 畿輔之役繁興
閭左有離鄉之生齒羨京軍之糧獨厚邊關有失伍
之戎行流民如蟻孰爲逃難孰爲奸細其人莫辨也
飲食若流食在則爲良民食盡則爲寇盜其釁難防
也昔之患在外防今之患在內潰欲施之恩而恩不
可繼欲示之威而威不可加蓋自大衆奔潰之餘生
殺要無善術而從關門一啓之後進退未有全謀此

時欲爲守關之計。馬廐空。藥局空。車輶空。銳砲空。甲仗之庫空。細問永平守撫寧令。則銅鍊無。硝黃無。工匠無。芻草無。豆粟無。再問之。沿途有司。則煤坑盡。秫稻盡。釘灰盡。車驟盡。民間槐榆等木。因造車造營房。一砍俱盡。天下之苦同。而畿輔之苦獨。畿輔之苦同。而薊永之苦獨。四方搬運舍永平。別無他路。卽鐵爲輪。石爲轂。亦無不敝之時。關上應供。舍永平。再無近地。卽天雨粟。地產金。亦無不窮之理。故薊苦而永始有甚焉。山海以永平爲根本。今般般剝削。則根本先摧。邊臣以永平爲室家。今人人思竄。則室家先

洋故欲守山海必從軫恤永平始使一郡之人心如
家人父子然患難相維久暫合一情固結而不解變
偶至而不驚永平之民脚根站定則薊鎮植其藩而
都城藉爲障一切征輸不得不緩歲課不得不寬逋
賦不得不免倉穀不得不留抽扣不得不蠲叅罰不
得不恕臣駐蹕關門靜觀時勢默察人情顯微盡是
危機上下皆無固志無一物可就手攜來無一事可
隨心做去巖牆已成獨立破甑聊以相遺拜命之
日傳書以囑妻子慨後會之難期強顏以慰僕僮謂
息肩之可待而孰知難上加難一至於斯也伏祈

皇上軫念時艱。俯憐民隱。少寬文法。容臣脉脉以運
規爲。嚴儆供輸。俾臣急急以先料理。外有求而必應。
內有應而必速。乘外寇之未臨。爲有事之先備。朕不
負、明廷之。任使疆場之臣。可收功於尺寸矣。奉
聖旨覽奏。邊疆情形。朕已具悉。卿還督率將吏。用心
振刷。務合機宜。使戍守有備。以紓朕懷。且無負委任。
視師尚書張鶴鳴報臣至關之日。八里庄以東人烟
漸絕。督臣王象乾差通使從各口外跟同夷使東至
廣寧沿路探聽消息。據朶顏三衛三十六家頭目。秣
暈大董忽力煖太貴英他。不能索只速讓台吉哈那。

彥不喇度台吉哈那顏蟒金他不能蘇不的九旦郎
素又罕字羅勢等前後報稟大都爲遼左全失恐額
賞無處出辦要挾講折其欲無厭其奮然欲與奴戰
則我難憑。但得其帖然不來作歹。不與奴合。則我之
大利。何也。遼左全沒一牆之外。沿邊千里無非虜穴。
無論奴酋即西虜一動。隘口可入者甚多。我防護不
暇。敢言恢復故今日東事惟撫賞西虜爲第一緊要
着數。今各虜俱上馬帶兵萬餘人裹糧住帳口外名
爲拒奴。實爲挾賞。自寧遠前屯衛以西至薊鎮六帶
朵顏三衛之虜也。雖狼子野心。時有反狀。然彼利我

賞終就寵絡。自寧遠以東至廣寧。皆虎墩兔愁、炒花、
宰賽、紫虜、元之裔也。部落雖多。其勢不聯。亦利我撫。
賞屬我羈縻。然其心皆不可測。督臣在宣薊前後三
十餘年。各虜祖宗俱受撫賞。督臣發諭帖數十道。虜
加額叩拜收受。以輕車熟路之恩。淪肌浹髓之衆。撫
之亦似可寵絡。經臣王在晉初受事。虜情輕重。撫賞
厚薄。明於指掌。諸虜相傳胥爲傾服。臣不過從旁唯
諾受成而已。○又云。芝蔴灣等處。尚多積糧。無人敢
取。各虜運糧至關。與百姓糶買。換布。關上糧貴。虜利
其布。百姓利其賤。殊爲兩便。各堡尚有銃砲。各虜謹

送載回大砲九十二位衆虜擡砲至海邊船上一時
效順若可訓養第夷性無常難保其無虞耳

王在晉題臣從抵關到任孤城如斗大中藏礮砲之
人心百事如絲棼外值跳梁之虜勢繇東暨西靡非
強敵自朝及夕未卜安危蓋從關門一啓之後非督
臣彈壓於前樞臣監視於後恐勢成破竹焚及燎原
亦安望中外之安堵哉先是臣未至西虜重駢接踵
蜂洩窺關往來八里舖一牆之外皆爲犬羊臣至諭
所部曰乞賞自有受賞之地切不可令近關今日引
之使近他日却難驅之使遠無奈往時頒賞逐日例

有支應今自關以及前屯虜騎充斥人踪斷絕與以
牛羊犒以段布賞以酒食非近關不能供結是以就
近餌之朶顏酋首浪素徠暈大等八人率諸酋百餘
人約諸部三十六家罕孛羅勢大小頭目百餘家漸
次鱗集罕酋意甚叵測欺我之弱妄逞憑陵又恃彼
衆明肆要挾其中有一種貧夷見互市之途絕貪貿
易以資生願我長有此土乃其實意故爲我禦寇者
什之三而乘機爲寇者什之七也督臣王象乾深諳
虜情與樞臣張鶴鳴多方調劑虜中強梗者督臣馳
檄諭之歷數其祖父受恩受賞世代恭順之狀且

惕之以利害明白開悟虜見諭帖而泣有爲中國
搬銅送大砲以素賞者有偵探奴情驀地來報者乃
督臣以離密雲久彼中亦非無事一聞臣至遂發牌
移駐石門虜愕然驚曰經略至賞事不諧矣亟欲解
散而督臣遣使諭之曰此經略與我同心爲朝廷
者也爾效順我勸經略與我撫賞一樣於是諸虜搬
運糧食與山海之人貿易匹布易米數斗居人利之
掘地得軍器皆徐徐運來討賞賊劫我之馬各夷獲
賊併馬送還且請正法虎酋亦走使前來講賞傳聞
合虜衆十萬與奴酋相構語雖未的亦不敢不聞於

上也。臣等非不知虜不可恃。款不可常。然不如此。則目前有闡關劫掠之事。奴之患在三百里外。虜之患在十里中。奴之患在山海一片石等處。虜之患極衝。有七十五處。次衝五十一處。全鎮通大舉五十三處。如破甕盛水。處處皆漏。急不可塞。失此一着。國之大事危矣。今講論已逾半月。因索勒太多。靳而不許。初七日三更報至。鐵塲堡北烟火聯絡。週圍五里。我既不敢多與以開釁。又未可加兵以速禍。款事紛紛未定。邊情洶洶可虞。而督臣移鎮石門。樞臣見臣受事。亦擬復命。臣一人耳。才力未可當關耳。目焉能

偏。及。查。各。隘。口。邊。牆。未。葺。器。械。未。整。兵。馬。未。足。錢。糧。
未。議。將。官。情。疎。軍。士。偷。閒。臣。卽。控。守。關。門。各。隘。一。有。
透。漏。爲。害。匪。細。須。得。大。臣。行。邊。整。頓。一。番。可。修。築。者。
鳩。工。應。添。設。者。增。置。臣。獲。寬。心。于。各。隘。亦。得。專。意。於。
危。關。千。金。之。裘。非。一。狐。之。腋。分。任。其。事。乃。可。協。贊。其。
成。矧。樞。臣。視。師。奉。勅。專。責。查。勘。關。隘。各。口。未。閱。遽。
難。報。竣。中。樞。已。有。閣。臣。掌。握。正。樞。臣。從。容。復。命。之。
時。非。脂。轄。趨。朝。之。日。伏。惟。皇。上。亟。勅。督。臣。專。管。
撫。夷。一。事。仍。移。蹕。關。門。以。便。調。度。樞。臣。巡。行。各。隘。整。
飭。兵。戎。俟。賞。事。成。而。後。督。臣。還。鎮。巡。事。畢。而。後。樞。臣。

還。臣雖不才願與二老臣同心協力共爲。呈
上。擔任危疆以副。天子臨軒授鉞之恩至于關事
艱難危迫之狀容臣續疏再悉仰干。天聽臣可勝
悚息懇祈之至奉。

聖旨總督官着就近撫賞西夷候事平畢還鎮視師
官查理各口整頓明白方可回部該部知道

御史張應辰疏云頃聞奴酋欲攻山海不軌奸民包
藏禍心瞋目語難或潛往潛來廣結死友或捏造流
言煽惑人心良民談逆奴而色變望榆關而心愴一
聞訛言舉。國若驚欲垂橐而往往徒手恐不能以聊

生將網載而行慮象齒因以自焚索索矍矍進退維谷。咸自擬于山頭之雀。似此景象無論大敵歷境即草澤間有崛起之奸宄而離散分析之象成矣。故曰一無足恃也。

王在晉題賑遼人疏臣欽奉

簡書有入關遼民務

在撫恤防閑沿海間田有可屯種者卽以安插其人毋令爲患等語是生活遼人者臣之事也。其奈天之降割於遼人也。有拋荒之田地而不得耕。有燒殘之廬舍而不得處。有破壞之城郭而不得居。降者已削髮而成禽。奔者且離鄉而爲鬼。老羸委身溝壑。少艾

轉眼從人臣一路經行見其遷徙無常流離載道其
流至真保山東河南等處者人數甚多此皆挈有行
資稍能自活者也惟是貧窶無歸不能行路者羣聚
薊永一帶州縣投狀投揭於臣動以數百計其散居
村落者且數倍焉臣批行各屬照部行賑濟然而各
屬倉穀無多在庫官銀久罄所謂動支銀穀者幾爲
紙上之空文矣塗莢但可爲戲而四餅未可充飢人
臣奉 朝廷之德意拯救生靈不以甘言而以實惠
臣安敢漫視 祖宗愛養之元元暴露郊原之白骨
乎畿畿輔經春久曠瘠土焦枯近關土著多拋棄地

畝逃竄他鄉有田者且不得耕無田者安能得種倘
月間無雨歲必無穡土民百爾憂生客民萬難活命
狡者化而爲奸細強者變而爲盜賊攘臂一呼十萬
人登時可致黃巾赤眉之事不在異代而在目前不
在遠方而在近地臣卽荷戈當關且憂內地之滋患
矣今時急着惟有賑濟賑濟原爲戶部之事而計臣
向與臣在 朝面議亦曾許諾好生一念諒計臣先
得臣心之同伏祈 聖慈發銀拯梓容臣移檄薊永
天津等道查貧苦流民分別等次造冊申報令州縣
分廠煮粥以存孑遺倘有積蠹侵牟貪吏尅減查訪

得實拏究參處其遼生牧附各庠世升收附各衛俾
各得所以銷異萌空閒田地聽遼民耕種以爲永業
亂離中保全性命以望太平此王者無外之仁也
而臣愚可副撫恤遼民之專命矣奉

聖旨遼民屢有旨賑恤這所請銀兩准給發但須嚴
行查核務沾實惠不得冒破

三法司會審經撫熊廷弼跪下言職起田間復起經
略原議駐劄山海並無駐劄廣寧字樣鄒都憲元標
云尖地喪城功罪一體難辭其責况屢奉明旨內
云提審二字又有確審字樣公竟然不理今日必須

暫進刑部。非自明公不必抗。旨如此反得罪于朝廷。弼言職奉明旨聽問。不是送問字樣。焉能將職下獄。相爭多時。王尚書紀說公不肯進部。叫錦衣衛旗尉暫時同到天仙庵住。一日職等上本請旨。定奪鄒王云。請過王巡撫來化貞跪下言。職苦職自知一言難盡。袖取一揭投上。鄒王云。公必須還有在朝班之日。一躬而散。○廷弼自上疏云。今初九日。法司會問職。亦不欲多言。惟是前旨止于革職。職猶一解任官也。後旨止于着法司問。未有下送字樣也。未定罪而先送獄。未奉旨而先赴獄。法司

之處職與職之自處者俱覺有所未便夫法司待罪
人之體與朝廷待大臣之體兩者俱不可不存以
重法司執法之體兼重朝臣之體伏乞勅下法
司以便遵行○審案大略云封疆大臣破壞封疆
國有定律百口何辭乃會鞠之日刺刺不休若謂不
宜與化貞同科詎知功罪一體明旨昭然即廷弼
與化貞書札亦有吾兩人同功罪禍福之語可至今
日移異其說乎廷弼試捫心一思喪師失地同抱頭
鼠竄同而其罪安得有差等胡不引從前經略觀之
也比之楊鎬更多一逃比之袁應泰反欠一死若厚

誅化貞而廷弼少及于寬罪同罰異非刑也不唯無
以服天下萬世之心恐無以服楊鎬袁應泰之心矣
王在晉題湖兵私逃疏本月十三日辰時署中軍官
毛有倫傳報防守北山湖兵紛紛下山北山去城數
里不知何故臣即傳監軍道袁崇煥查問併令總兵
王國樑李秉誠往諭始知爲湖兵五寨司莫大功李
應魁向世爵田應封下目兵詢其故曰今歲 皇賞
銀未給也正月四月錢糧未領也經管官剋減給散
不能如數也關上百物騰貴糧薄不能資生願往
京師就新餉也是以相約同行夫今歲原無 皇賞

明係托詞正月潰關而入錢糧尚可問乎四月纔及
中旬安見其遲發乎百物騰貴詎獨湖兵受困乎經
管官扣剋何不控告而乃相約私逃乎隨發 令旗
撫諭招之使回于中有二千人劄住其大半竟行不
顧矣二總兵復差官稟臣招之不回何以處之臣知
土兵最悍非言可諭卽發騎兵緊追一面差官先往
撫寧堵截一面差官往前路預備糧草以防追兵之
困乏逃兵就撫則已不則立誅首惡正法各兵見騎
兵邀截張弓露刃傷及人馬當被都司丘臣守備麻
登雲卽率家丁力擒拒敵首惡廖老留張友學二人

斬首又戳傷數人各兵見勢不敵遂下馬跪稟願回
原伍二總兵傳令止殺押歸原派北山地方屯劄是
夜西關外又報湖兵在飯店中因飲食起競殺傷一
人十四日因安砲相爭又戮傷兵一名相爭相聞無
時不有官告兵兵亦告官官被革而兵無主兵被創
而官益驕易置總把則土兵不習于他將仍舊統轄
則號令不信于三軍當楚兵之應調也脫巾于中路
鼓譟于出關每遇朔旦川湖兵燒紙望南而哭挑動
各兵懷鄉戀土之情平時梟勁蔑法今又結夥潛奔
紊撓軍律留寇不爲我用益重地方之憂殺之恐及

無辜致滋決裂之禍。散之則各軍效尤。釀成瓦解之勢。處置之難。無有甚于斯者。先是遼民同潰。兵進關。良奸混入。人情洶洶。伍有虛兵。人多冒食。事權不一。嚮背各殊。有所惡于此。則逕投于彼。傍竊以逞其威。雜出以樹之黨。道將之肘。旣掣。軍士之情。益詭。湖兵瞋目語難。軍中誼傳爲奸。細引誘挑禍。以激之。變無柰。城中防範嚴密。中堅不動。兵不可撼。傍觀者遂惕息而不敢前。自非劫之以威。四千人狼奔鼠竄。永薊騷然而。京師且賊聽矣。逃兵歸伍。不終日而底定。則總兵王國樑英銳直前。李秉誠恩威並用。師武臣

之力居多焉。此間卒徒叢聚，孽孽易萌。當臣受事之初，卽小試強梁之狀，爲三軍榜樣。萬一膽寒氣怯，必入套中。縮胸不能行法，經略一日不可做。山海一日不可居。西虜交錯于關外，驕卒狂呼于關內。安危之機立判，潰散之勢卽成。線索一提，繇人舞弄，乘易動之人心，爲挑撥之隱術。臣于此而識奸宄之人情矣。向來兵驕卒玩，五步之內不聞以頸血相濺，心神只想狂奔。足跟曾未着地。有兵如此，卽百萬摠歸無用。國家空費金錢，蓄兵轉憂釀禍。當年數千里之征調，是亦不可以也。平倭款事少定，容臣一一清汰兵寧。

寡而毋襲充伍之虛名。餉寧增而毋蹈濫觴之積弊。其必不可留者。我操斥革之權。其不堪久戍者。旋議更番之法。人心安。軍紀肅。庶幾長有斯土乎。除將元惡首級懸掛號令。其各營將官鈐束不嚴。及格鬪傷人。目兵暨軍中揆置奸徒。兇犯聽臣徑行拏處。外伏祈聖明裁鑒施行。奉

聖旨。五寨各兵。仍着原領官統轄。其核兵足餉併汰留更番等事。便作速議行。

初。湖兵下山奔竄。擒其爲首者。鞫之云。某鄉宦有書招之人。京保熊經略也。某思此事甚大。嘿嘿諱

之及閱邸報太僕少卿滿朝薦疏云湖兵臣郡辰
州應募者廣寧失陷郡人在陣日久每以桑梓求
見臣故得訪遼廣失事之詳云云蓋山海耳目甚
多叛兵之言一吐便飛達京師先以微言隱隱
辨釋其意甚深而予終付之忘言不然熊公必于
此時被僂太僕其能有完計哉

王在晉題叅逃將照得廣寧之陷經撫道臣逮問者
五而總副無一被析楊者四五賣菜傭無足膏斧鉞
且東逃西竄未能就縛令人有餘憾焉 祖宗朝于
守邊將士責成甚重法律甚嚴今以文臣比武臣之

律其究且以武臣用文臣之法恐非。本朝立法之意而文臣終屬有詞。率繇此道。將領臨陣望風終得不死而文臣身不跨馬射不穿札其能賦詩還虜乎。今在關武官多從關門遁入。然有腐心刻勵以圖報効者其罪可原也。有才畧頗優而未經委用者其過可使也有備員奔走而未可責之以大義者其情可宥也。惟是因敗以爲利借逃以脫身玩弄。王章閔不畏死非殺之則逐之。三尺可容寬假乎。內參總兵達奇勲應禰奪中軍都司王藩遊擊盧養才都司史光裕分別議處。總兵孫顯祖已經提問應追馬千匹。

以還山海總兵竇承武從入關即流寓于天津真保之間應行彼處巡撫押解來京水兵都司保世寧當拿問浙江領兵叅將袁應北應行浙撫拿解究問因原遊擊陳愚直亟令彼中巡撫斬首傳至京師號令奉

聖旨該部作速議覆

王在晉又叅管關同知張文達任內放過軍餉七十餘萬當量追銀一萬四千兩行陝西撫按勘產嚴追解山海關爲修城築堡之費

大學士葉向高等奏臣觀遼報遼人避難入關者至

二百餘萬。彼其倉皇奔走。既不能有所挾持。卽有微
貲。亦隨手立盡。糊口之計。旣窮。走險之謀。必起。自來
流民爲亂。殷鑒昭然。宜令倣古屯田之意。分布逃民
量給資本。使之力耕。二三年後。可變荒蕪爲成熟。亦
可聯保甲爲戎行。然須專官督理。所需錢糧。預爲設
處。卽捐二三十萬金。亦勝于坐觀其亂。爲費更不貲
也。年來議論紛囂。人情厭苦。廣寧失事以來。業已兩
月。章疏如山。半爲經撫爭論。而一切戰守兵食事宜。
併未見着實料理。言當倣者。卽是不肯倣之人。言肯
倣者。又不必倣之事。其究只是爭門戶角意氣。國

家不得議論之利。而反蒙其害。此其爲禍甚于干戈盜賊。今經撫已俱送法司三尺之刑。書具存。千秋之公論難掩。亦何用哓哓爲哉。今日催科太急。禍變愈生。內帑所積亦自有限。臣等再三籌畫。無計可施。惟將十庫錢糧稍可緩解者。盡行折色。一二年以濟軍需。其蘇杭各處織造。自供應袍服及賞夷段匹外。大加減免。俟事平之日。仍照舊例。雲南貢金道路已絕。征之無益。亦宜傳示免解。至于內府一應宣索。雖常例所有者。併行節省。使天下又安。何患無財。有如危亂。積金盈斗。亦安所用。至于目前緊要諸費。不

得不有望于 內帑者尚須給發以掄然眉摠之爲天下國家計耳○以太僕卿董應舉兼御史管理直隸天津至山海關等處屯田安插遼民又發銀十萬兩賑恤之

興屯田安流民折內庫充軍實此俱在晉所條奏者惜乎天津屯種董太僕虛冒其名實銷其費發銀十萬兩晉力請得之而付之不可問今流民所種之屯安在哉內庫錢糧省直編額甚多量折可充經費然皆中貴把持例索鋪墊誰能扼其吭而

王在晉題刪冗懲貪疏竊惟朝廷設官以治事也。乃官多而事益亂。蓋職掌分則無專成之効。事權析則生推諉之端。邇因遼患作而設多官。謂藉衆謀衆力以存遼。而遼卒爲多官所斷送。一事而互生異議。必至爲三年之築。一方而羣使其民寧免。夫九牧之嗟。且新設之官。廝隸皆從催募。則體統輕。邊徼之地。供應責其周全。則物力敝。廩給心紅等費。門皂書役。工食皆取足于新餉。增一官計一歲所費可養二百餘兵。且各分募家丁。凡精壯多托身標下。有事未必操戈以臨陣。無事則徒糜餉以偷安。將領伺文臣之

色極意阿逢文臣掣將領之肘。故爲抑勒。彼此牽合。遂喪厥功。今山海一片地。兵至六七萬。事事皆無條緒。般般未有法程。向來止一管關主事。一管關同知。卽山石道皆爲龐贅。何有于監軍司道哉。臣介然處此。從來無額編之供應。從來無答應之人役。建牙于蓆棚草舍之間。與馬牛同混混而已。先是樞督二臣將官兵分爲三部。守護邊城。中部屬山海道。今有副使閻鳴泰在焉。南部屬西路監軍叅議邢慎言。北部屬遼東監軍僉事袁崇煥。此三道者。斷乎不可少者也。然錢糧草料之出納。水陸舟車之轉運。馬匹駝騾

之牧養須得一監司之兼督而寧前一路雖虜騎充塞俟西虜講賞既定擬發游兵哨守前屯而目前所撫之夷皆寧前受賞之夷則寧前兵備其何可缺乎張應吾雖經樞臣勘擬降用然當遼瀋之初失本官慷慨而直前比廣寧之既陷本官遲回而殿後青燐忽驚遍野雖無保全疆土之功而黃壤猶存故墟要無失陷地方之罪時遭異變情屬可原似應免降以期後効再照遼東雖失而我未可一日以忘遼則西路監軍邢愼言應帶遼海東寧等處職銜遼東監軍袁崇煥應帶開原屯馬職銜寧前兵備張應吾應帶

廣寧等處及糧儲馬政職銜登萊監軍道應帶海蓋等處職銜至于經略之監軍及西平堡盤山路中路南路廣寧路及出使朝鮮南路監軍盡從裁減登萊監軍亦止存其一天津遼餉併歸兵備道似可兼管山海關府佐應留應減容臣查議停妥另疏題請一年之間可省餉銀二三萬裁去各道家丁等役可養兵四五千此皆節浮省費之實事也。

南道劉之鳳題今日榆關一線呼吸存亡專在于此守山海正所以守陵京也欲保守得固須要人心站立得定臣以爲欲固未固之人心當說明未明之

法紀如新經略王在晉近叅總兵達奇勛縱王藩盧
養才侵剋多賍明是貓鼠同眠以軍糧爲谿壑總兵
孫顯祖殺屬夷以報功廣寧失陷魂搖膽落午夜放
妻孥放軍過關奪良馬幾千匹搶刀弓矢器械攜戲
子沿途歌唱總兵竇承武冒餉幾千金廣寧旣陷遲
留觀望似欲効孫得功之故事都司保世寧諛兵冒
餉縱部殺兵叅將袁應兆領兵不肯出關僅覓流丐
充數虛扣行月二糧遊擊陳愚直業經部覆出關之
日實緣免究以此等武弁馭士卒方且疾怨之唾罵
之疊越而告訐遂不敢詰問尚望其能行法于行伍

而使就我約束哉人但知大兵之潰敗者起于法令之壞而不知法之所以壞而不振者因貪將之自壞而不能固人心也若不一一叅勘即爲處分何以振綱飭紀剔蠹懲貪願廟堂之士早計而力行之庶人心早知儆惕邊事早知振刷所全于危疆者大矣刑科張鵬雲題職在刑言刑竊見法度凌夷至今極矣從來閫外之事將軍制之廣寧之潰倘有二三大將提師督陣奮不顧身豈遂決裂至此而望風奔逃諸將與經撫同遼瀋失而逃之廣寧廣寧失而逃之山海則諸將經撫更有甚焉胡以置諸將而不問

職方欲具疏特糾適見經略王在晉有查叅奔逃貪縱將官一疏殊快人意。抱頭奔來賍私狼籍而止于削籍不適遂其奔願乎主將不固守如達奇勛者何以解于此律豈法可行于經撫獨不可行于武弁乎恐天下謂朝廷從此無法也

御史潘雲翼題稱河西潰陷全遼陸沉以至重之地處至危之勢當至急之時經臣抵關以來戮力勸勦。嘔心籌畫行將漸有次第。據其前後諸疏矢口迫切累牘艱危。蓋有不勝累卵之形焚絲之歎者。皇上誠思以山海之勢若此奴酋之勢若彼幸不來耳來

豈有幸哉。職爲今日之計。志宜定而不宜亂。則莫若畫地而守。兵貴精而不貴多。則莫若簡兵而練。權宜重而不宜輕。則莫若選將而任事。宜實而不宜汎。則莫若擇人而理。山海斗大一城。官如蝟集。事若絲棼。蓋維官多以致事冗。今日不苦無官。而苦多官。不在官少廢事。而在官多壞事。此誠有見之言。經臣刪冗一疏。謂遼患作而設官多。欲藉衆謀衆力以存遼。卒爲衆官所斷送。語更痛切。職目擊時艱。中懷長慮。國勢人心。日見危疑。抗惶之狀。邊籌。○廟算不改。因循延緩。恐常握火抱冰。其何容已。亦以眼前拯急之策。

中外實落之圖要無先此誠能防守力爲圖維兵將
大爲整頓夫然後羈縻西虜方無玩我之心聯絡朝
鮮益堅効順之志又將在內一應軍馬錢糧甲仗火
器等項勤施不匱以濟急需在外一應修城濬壕建
烽築臺等項明作有功以收實効則山海重地尤泥
可封而蠹茲逆酋又豈上厯聖主東顧之憂哉
兵科朱大典疏云竊惟古者寓兵于農平居則爲比
閭族黨之民有事則爲伍兩卒旅之衆田野倉庾之
積蓄即征行士馬之芻糧制甚善也今榆關一牆之
外便爲虜穴經臣王在晉遠見定識力汰冗兵所省

糧餉不貲見在實兵六萬派守猶虞不足誠于近畿
郡邑各練土兵數千以壯聲援節節設防處處扼要
彼虜騎安得奄然長驅哉伏乞嚴勅各撫按督率
守令勒期舉行所裨于防馭征勦不淺矣

王在晉題撫賞諸夷其屬夷來守關外也始于罕
孛羅勢之窺犯一時聲勢甚大塞上人心悚悚皇皇
若朝夕不能自保者臣差加銜都司閭守信通官王
擒胡往諭又差番僧喇麻王三吉八藏遊擊守備等
官張定王朝宗再往諭宣布皇上威德罕酋懽然
省悟懷我好音自云我家祖父老把都青把都自洪

大等受了天朝撫賞厚恩五十餘年。今遼東欲剿殺奴兒哈赤。我願出力報効。發帳房三百頂。傳調朵顏。狝暈大等帳房一千頂。同去哨守山海關外。此屬夷守寧前之因也。臣惟廣寧旣陷。數百里間。虜騎充斥。路無行禽。河西音耗不聞久矣。自各夷入邊以來。遊騎來往。遠哨連山。皆諸虜爲我引導。寧遠城中。卷案冊籍銅斤大砲。皆諸夷爲我負載。米豆高糧。灌輸榆關。人無枵腹。皆諸夷爲我搬運。其最切要者。樵採燒造。修築挑挖。斧斤尋于山林。畚鍤狎于原野。不可謂非諸夷力也。狝暈大于諸酋。中最稱驍雄。而諸酋

亦咸聽其順指戍守關外發蹤者雖罕字羅勢而追隨者狹酋之力居多但其初來也只言報効朝廷絕不道及賞之一字既則討接風祭旗矣既又討舊賞矣繼又討新賞討部夷月糧且欲比招募之例矣夷性犬羊谿壑無厭臣等槩不之允諸夷請討不已四月十五日臣與督臣進諸夷演武場宣布我皇上德意許以舊賞其新賞與諸部夷之犒賞一絲一粒一分一毫槩未敢許夫舊賞者載在冊籍歲額之撫賞也迎風祭旗各堡軍民懼其蹂躪箕歛之私賞相潛售久亦舊債也新賞者哈喇慎諸部台吉與亞

顏諸酋之子若孫向來無賞而朵顏之裔婚于哈喇
慎者皆得稱酋不浪昔也。幼今也壯矣昔也卑今也
尊矣無者斬于有者斬于多涎垂頤朵遍相加也
曾何厭之有臣再惟新賞雖不可加而亦終不可截
然終止者也。部落窮夷雖不可盡如所請而月犒以
獎其勞亦情之必不可終已者也。譬之養鷹可以翮
然懷我亦可以颺去。依人懷我則肯爲我用。依人則
將爲人用。至于爲人用而天下大事不可復收拾矣。
狼子終是野心。鳩目竟亦難化。一去一來介在呼吸
不可不慎者也。臣度虜情形又度我時勢不得不借

虜爲用。又不敢必虜之終爲我用。卽終肯爲我用。而我亦何可終恃虜以爲用。斟酌於緩急輕重之間。如魚者之釣。吞舟椎牛爲餌。投于萬仞之淵。一入其口。欲吐不肯。欲去不能。而後操縱在手。庶可以制其死命。而惟我所用。雖然。薊鎮三陟。環二千里。隘口數十。虜騎在在皆可躡入。爲我腹心之患。奚啻山海諸酋之舊賞。新賞部夷之移帳。犒賞亦非虛擲。不徒禦外侮。亦以杜內萌也。況諸夷之來也。枕戈臥甲。亦云勞矣。露宿風食。亦云苦矣。酬其勞苦。量與些微。譬之飼犬。然投骨于地。欲其司守而吠盜也。脫也不投。且有

噬指之虞已諸虜之來名雖恭順慕義豈其果出真心無亦利漢財物姑帖耳搖尾乞憐于我者乎就其來而羈之爲力甚易待其去而招之爲費滋難蔑克濟矣徠酋之死無足爲異第其來也保護關門爲主事而來也其歿也死于軍中爲王事而歿也借其効勞之名量示優恤之意彼旣護我藩籬我亦何惜惟蓋卹其死者勵其生者亦今日當機一着也○西虜運河西弃米經略復差官括各島存粮抵關軍餉不絕其夷人發遠民窖藏米粟聽山永居民以布易之失風濕米服濟遼官遼生暨流民入關者多寡

量給關內難民俱各安堵其大將軍滅虜虎威等砲
銅鑲遺械及衙門卷宗等件夷人俱送至取賞款虜
議關聲勢大震奴酋膽懾亟築新城以圖固守遼將
祖天壽向踞海島亦聞風思附

河西失陷經撫爲仇其視中樞亦如仇各分門攻
訐晉以抗言取憎其推經畧也必欲置之絕地謂
萬分不能自免也晉亦矢心拚命慨然直任不請
帑以矯其用帑之多不請兵以矯其調兵之衆
不促餉以矯其耗餉之濫沙汰冗員以矯其用人
之濫裁局設鎮以矯其轉運之煩誓衆堅守以矯

其弃地之失大爲時論所嘉與遂爲羣黨所側目
必欲與敗同事而後始快其夙心孰知彼蒼憐佑
諸事瓦全獲追罪戾其始湖兵之鼓亂本兵張公
執訊戎首謂長安某某馳書情事甚確而予隱忍
不發以消大釁於是妬我者無計可施而簇擁樞
輔行邊襲其成事害其成功人謀如此遼事安得
不決裂哉

經略設局開平委主事沈際鑄造軍需就近取煤以
省運價

南科徐憲卿奏稱年來最病痛處在多設監軍多則

徒使將領分心於支移營精於迎合昔李郭不世出之將一監以魚朝恩而猶不免敗况庸將乎新推經畧王在晉雖不以揮霍交口凌厲示長臣知其品端心慎決不以封疆爲戲者臣見正月間奴酋過河關上去廣寧有幾塘報斷絕購探無人今中前屯所等處猶未陷沒近報朶顏西虜俱往往牧雖曰借名守邊恐非持久長策則閑以外我無一人一騎敢出矣此何等地何等時尚不蚤爲之計耶外陶朗先報奴子被殺或借以文其不能進兵之失而未必真報梁之垣鐵山島壞船不過爲支銷二十萬餉之地而未

必確此總於遼事交關當查催以助毛文龍之一臂者也

遼事實錄卷之八終

遼事實錄

卷之八

五十五

壬戌